

恪靖奏稿初編卷七目錄

奏報連復六縣布置情形摺

分別審辦龍游首逆片

瀝陳餉項支絀緣由片

請將楊知府開缺以道員用片

奏報克復郡縣城池布置情形摺

瀝陳浙省殘黎困敝情形片

浙江初次米捐援例請獎摺

請將初次米捐照常覈獎片

陳明紹興蕭山克復詳細情形摺

查明法國參將陣亡請

卹摺

浙江甯波新關經費請作正開銷摺

甯波新關另設巡船經費請於洋稅項下開銷片

奏報連復六縣布置情形摺

奏爲官軍連復武義永康東陽義烏浦江諸暨等縣城
見籌布置情形恭摺馳

奏仰祈

聖鑒事竊龍游湯溪蘭谿等城經官軍攻克後金華敗
賊與首梯戴三逆由義烏竄赴諸暨譚星率蘭谿敗賊
竄赴浦江臣比飭蔣益澧分軍由武義永康義烏進剿
劉典由浦江進剿合攻諸暨適據督臣調攻武義之總
兵林文察署永康縣知縣程陶成馳報武義永康之賊

於十三日同時遁走林文察督軍追殺當復武義程陶
成率團收復永康復據探報東陽義烏之賊亦聞風向
諸暨一帶潰竄劉典急率各營進徧浦江該處踞逆正
思逃走十八日劉璈黃少春等率所部馳至斬殺數百
名追至離城五十里之白馬橋始收隊還當將縣城收
復劉典卽飭各營乘勢徧攻諸暨黃少春黃有功李耀
南喻可宗楊芳桂率所部由牌頭以攻諸暨之南劉璈
朱明亮齊蘭禮率所部由草塔以截賊出路該處民團
見官軍至無不踊躍爭先願爲前導廿二日四更黃少

春等督隊行至距城二十里地方出賊不意擊之擒斬數百賊敗入城官軍齊抵城下民團復於四面喊殺奮力圍攻城賊千餘驚慌無措遣人詣黃少春等軍前乞降黃少春等受之二十三日遂率官軍團勇入城當將縣城收復其投誠之賊經劉典飭令薙髮遣散歸籍見據各路稟報金華敗賊與首梯戴三逆竄赴諸暨後聞官軍將至復向義橋竄遁其意在回竄杭州可知諸暨逆匪聞已回竄紹興蓋自龍游湯溪蘭谿金華圍堅城破後羣賊喪膽一聞官軍躡蹤追至卽奪路狂奔走無

停趾惜前途無兵阻截未能聚而殲旃其粵賊譚星一
股由浦江敗竄聞爲李秀成之黨所阻不敢回竄杭州
見已竄近桐廬臣已飭蔣益澧一軍乘勢進攻紹興劉
培元率所部水師順流而下會魏喻義所部合擊桐廬
之賊遏其西趨臣已移軍蘭谿俟將金華等處布置稍
定卽親赴嚴州調度一切其劉典一軍仍須由嚴赴徽
爲肅清皖南之計必俟皖南局勢漸定江皖邊圉又安
然後臣軍無後路之虞方可一意進取至督臣派來援
剿之康國器一軍及閩粵各軍臣已緘商督臣飭其暫

駐東陽縉雲一帶以壯蔣益澧後路聲援暫緩前進因
見當進攻紹興之際甯波之軍已早抵北官渡署總兵
勒伯勒東傷故後洋將買忒勒繼之上年粵勇與洋兵
構隙已深康國器所部多是粵勇用之紹興恐非所宜
卽蔣益澧進規紹郡臣亦密屬其豫飭諸將如與洋將
共事惟守禮示信勿計功攘利致啟爭競之端所有連
復六縣及見籌布置情形謹會同協辦大學士兩江督
臣曾國藩閩浙總督臣耆齡恭摺馳
奏伏乞

皇上聖鑒訓示謹

奏同治二年正月二十七日

議政王軍機大臣奉

旨另有旨欽此

同治二年二月十二日內閣奉

上諭左宗棠奏官軍連復武義永康等縣城一摺前據
耆齡奏林文察等軍攻克武義永康兩縣並東陽義烏
等縣賊匪被擊潰竄情形業經明降諭旨宣示茲據左
宗棠奏稱官軍攻克武義永康兩城後東陽義烏之賊

聞風向諸暨一帶潰竄按察司劉典督率各營進逼浦江該處踞逆正思逃竄正月十八日劉璈等率所部馳至殺賊數百名追至離城五十里之白馬橋始行收隊當將浦江縣城收復劉典復督飭各營乘勢進逼諸暨分道進攻該處民團踊躍前導二十二日黃少春等督隊行至距城二十里地方出賊不意擒斬數百名賊敗入城官軍民團齊抵城下奮力圍攻城內餘賊千餘人窮蹙乞降官軍於二十三日整隊入城當將諸暨縣城收復其投誠之賊經劉典飭令雍髮遣散歸籍勦辦甚

屬得手著左宗棠督飭劉典等軍迅卽乘此聲威將諸
暨等處逆匪悉數殲除並會合閩軍進規紹興等城以
靖地方欽此

議政王軍機大臣 字寄同治二年二月十二日奉

上諭昨據耆齡奏報克復永康武義兩縣詳細情形當
經明降諭旨宣示茲復據左宗棠奏官軍連復武義永
康東陽義烏浦江諸暨等城一摺復經明發諭旨將各
城收復情形宣示矣前經疊次寄諭耆齡左宗棠以浙
境軍聲丕振勢成破竹卽當乘勢進取紹興以復浙東

並令耆齡仍駐紮浦城以防賊復竄由皖入江西滋擾
令左宗棠仍當分兵嚴州以清皖境而顧全局見在金
華敗賊竄赴諸暨後聞官軍將至復向義橋遁走自係
回竄杭州其諸暨逆匪已回竄紹興著左宗棠飭令蔣
益澧之軍乘勢進攻痛殲醜類速復紹城粵賊譚星一
股由浦江敗竄爲李秀成之黨所阻不敢回杭而竄桐
廬卽著飭令劉培元迅率所部水師順流而下會同魏
喻義所部合擊之以遏西趨左宗棠見在移軍蘭谿擬
俟金華等處布置稍定卽親赴嚴州調度其劉典等軍

仍須由嚴赴徽肅清皖南俾左宗棠無後顧之虞方能
一意進取所論甚合機宜著卽照所擬辦理昨據李鴻
章等奏中外官軍進攻紹興法國兵官中槍陣亡洋將
買忒勒繼之見當進攻紹興之際耆齡所派赴浙援剿
之康國器一軍及閩粵各軍著卽飭令暫駐東陽縉雲
一帶以壯蔣益澧後路聲援傳聞紹興已有克復之信
各軍均屬在事出力自可同膺懋賞又聞上年粵勇與
洋兵構隙頗深自當豫爲防範毋令糅雜以致別滋事
端並著該督撫密飭諸將與洋兵共事總須守禮示信

勿許計功攘利致啟爭競之端且爲外國人所竊笑也
紹城克復及籌定戰守各情仍著隨時速奏另摺奏請
飭催各省欠餉已照所請寄諭閩粵等省迅籌撥解楊
昌濬本日已照左宗棠所請明降諭旨開缺留營以道
員補用衢州府一缺已簡放林聰彝該員前係左宗棠
所保見在是否在籍抑在該撫軍營著左宗棠催令迅
速赴任勿少遲延將此由六百里各諭令知之欽此

分別審辦龍游首逆片

再龍游首逆陳廷香李國羣臣前次奏報業經官軍陣

斬頃據蔣益澧將李國羣並僞膺天義萬連勝燕天安
陳其得文軍政司洪董義等押解前來臣詳加審訊據
供陳廷香實經官軍在白龍橋地方殺斃該逆等逃至
湯溪官軍前後緊逼率其死黨乘閒翻山竄逸至蘭背
源復遇參將化儒之軍阻截因下馬投降詭稱李懷忠
希圖免死其僞印僞令係交賊目裴天福劉洪飛帶護
同行已經龍游追軍擒斬奪獲矣訊以賊中之事據供
待逆李世賢因上年夏閒與僞對王洪春元在浙江爭
鬪洪逆歸訴金陵賊渠洪秀全乘侍逆同時卽將其鎖

禁自上年九月以來並未接待逆僞文等語是金陵羣賊自相猜忌亦可概見臣查李國羣在賊中最高悍驚茲當勢窮力竭之時始乞命投降復詭易本名希圖免死與尋常畏罪輸誠者有閒自未便任其漏網惟連日接獲逆犯甚多應暫留質認俟事畢卽當處以極刑用

申

國法其萬連勝陳其得兩犯從賊已久身面創痕宛然訊畢卽予正法梟示理合附片聲明伏乞

聖鑒謹

奏同治二年正月二十七日

議政王軍機大臣奉

旨知道了欽此

瀝陳餉項支絀緣由片

再臣軍餉銀軍火本省無從籌措支絀情形久已仰邀洞鑒見因復地漸廣需兵愈多臣軍添募及臬司劉典所募新勇合計四千餘名轉瞬到齊臺庫早空無以爲計此外尙須添造戰艦雇募水師亦因經費無出暫未舉辦而見在各軍之餉積欠已九箇月忍飢力戰雖未